



tü
davent
id es
commovent

tuot
normal
o almain
quasi
tuot

tü
deliberà
eu
disperà

basa
storta
sül cheu
debla
basa

tü
mort
eu
sainza cuffort

«Eu sun simplamaing üna Rumantscha cun ün'idea»

CUN CORINA GUSTIN
HAI DISCURRI FLAVIA HOBI

■ La pagina www.latabla.ch è ina pitschna istorgia da success. Inzianta è Corina Gustin ch'è creschida si a Tschlin. Ella ha absolvi la HTF a Cuira e suenter lavurà en il marketing dad in'agentura da viadis. Dapi il 2010 lavura Corina sco assistenta tar ina banca a Turitg. En il temp liber ha ella fundà il project LATABLA ch'ella tgira. Ultra da quai giuda ella en il temp liber il Lai da Turitg e l'Engiadina, concerts, fa yoga e viagia gugent.

Corina, sas ti anc cura e pertge che ti has gi l'idea per la pagina [latabla.ch](http://www.latabla.ch) u tge era l'intent da questa fundaziun?

Corina Gustin: L'idea m'es gnüda dürant ün da meis viadis plü lungs a l'ester, avant bod 10 ons. Pür schi's banduna la patria per plü lösch s'imprendra a predschar la famiglia, l'aigna cultura e lingua. Plü bod nu d'eira il rumantsch bler da special per mai, ma cul temp e davo cha uschè bleras personas in divers pajais d'eiran adüna darcheu inchantadas da nosa lingua, seis origin e si'istorgia, n'ha eu realisà quant unica e custavla ch'ella es. Diversas da quistas personas in pajais esters vessan gugent let ün text rumantsch per til analizar (la majorità dals interessents vaiva impris latin), ma l'internet d'eira amo giuven e texts rumantschs nu's chattaiva practicamaing ingüens. Inse mancaivan l'innovaziun e la dinamica. Daspö quai n'haja gnü l'idea da crear üna plattform online chi publichescha regularmaing istorgias e texts rumantschs. Amo hoz cha l'internet es omnipreschaint ed ha lö in mincha gialoffa es LATABLA ün unicum. L'idea d'eira da far attent a quel fat e da muossar cha minch'ün po promouwer il rumantsch in ün möd modern.

Tge eran ils emprims pass, tge era tes concept?

Il prim d'eira da chattar ün'agentura chi realisescha üna pagina d'internet uschè cun ün büdschet modest. Quella tschercha es statta zuond stantusa e dischillusa ed ha düra circa duos ons. Bot cha'l project füss croudà ill'aua per vi da quai. A la fin n'ha eu decis chi füss il meglter da tilla crear svesa. Dal 2001 vaiv'eu fat ün cuors da html ed ill'agen-



tura da viadis ch'eu lavuraiva da quella jada vaiv'eu fabricà sü e fuorma la pagina da la firma uschè ch'eu d'eira fingià versada cun divers systems e linguas da programmaziun. Hozindi stan a disposiziun programms amo plü practics ed uschè han bastü duos cuors dad ün mez on ed il sustegn dad ün mentur per realisar la pagina uschè sco ch'ella exista hoz.

Davo ha cumanzà la tschercha dad auturs interessats e l'analisa da finanziaziun. L'important d'eira ed es amo adüna: Ils auturs dessan surgnir üna recumpensa per lur lavur sco freelancer e quai sto gnir finanzia tras sponsurs e donaturs, na tras subvenziuns. La tschercha da sponsurs – quell' experienza fan sgüra eir oters – ha dovrà e dovrà amo adüna bler temp e bler engaschi. Il concept d'eira ed es amo adüna quel cha minch'ün as po s'engaschar in alch maniera o laschar publicar ses text sco giast.

È la pagina sa sviluppada sco ti has mess avant?

Bleras lavurs importantas douvan daplü temp sco ch'eu vaiva pensà ed uschè nu resta bler temp per oter – co per exaimpel per optimaziuns. Ün artichel vain let da fin 400 personas, ma la vita sülla pagina e l'interacziun mancan amo suvent. Ils auturs nu tschüffan bler feedback, quai es puchà. Ün dals pros-

sems müdamaints plü gronds sarà da müdar quai. Cul svilp da la pagina sun eu fich cuntainta; ils auturs sun engaschats, diversas personas sustegnan il project e plüssas organisaziuns sun gnüdas invers mai cun ideas e sun activas sün LATABLA. Quai fa grond plaschair.


Co vesas ti il futur da [latabla.ch](http://www.latabla.ch), has ti anc ideas u projects en quest con-

next? Ideas n'haja bleras. Pero suvent nu sun ellas realisablas, saja quai our da motifs finanziais o politics, ma eir our da motifs da temp. Divers lecturs am han contactà cun ideas, diversas sun fingià gnüdas integradas ed eu m'allegr sün mincha nouv contact o commentari.

Datti uschiglio anc insatge che ti vul menziunar?

Eu nu sun üna scienziada da comunicaziun. Simplamaing üna Rumantscha cun ün'idea.

Tgi ch'ha gust da publitgar in text sin [latabla.ch](http://www.latabla.ch) dastga gugent s'annunziar per mail sut info@latabla.ch. Ma era uschiglio vali en mintga cas la paina da dar in cuc sin «tia pagina rumantscha» – franc e segir hai per prest mintgina e mintgin da nus insatge interessant. Era sche Corina s'engascha sin basa volontaria, ils auturs vegnan pajads e [latabla.ch](http://www.latabla.ch) è adina engraziavla per contribuziuns da sustegn e sponsurs. Las indicaziuns correspondentas chatt'ins sut <https://www.latabla.ch/sustegnair>



Pasch

■ S'imaginescha inaga co ei fuss sch'ei regess pasch sin quei mund, e patratga vid las consequenzas che aschia ina greva e tuttina leva caussa purschess. Mo per far quei stuein nus igl'empre capir enzatgei. Sin quei mund stos ti e tut tschels carstgauns enconuscher ina differenza, numnadamein quella dil bien e dil schliet, e cumbatter per la buna vart. Ei fuss aschi sempel. Daco funcziuna quei lu buc? «Tschels ein è buca megliers», ei ina stgisa che biars drovan. Ei entscheiva denton sulettamein cun tei. Ils patratgs dils auters sas ti buca midar, ti sas denton influenzer e schizun manipular auters carstgauns. E damai che ti vivas buca persuls influenzeschas ti mintga di personas, sche ti vul ni buc. Sche ti sedecidas per la buna vart influ-

enzeschas ti auters carstgauns cun tia energia positiva, la quala ti survegnas pli automaticamein anavos. Tuppamein capesch buca tut ils carstgauns quei e fan diever dalla schliata vart.

In nievnaschiu ha negins patratgs negativs, ni ha in affon pign gia inaga fatg enzatgei dil schliet a ti? Quei tut dependa dall'educaziun e dil contuorn con bia energia positiva ni negativa ch'in carstgaun porta en el.

Sche ti capeschas quei ni buc, metta uss avon co ei fuss cun sulettamein la buna vart. Sch'ei dess negin'uiara, scuidonza, tema ed odi, persunter dapli carezia, fidonza, legria, toleranza e ventira, vivess ins sin quei mund sco el paradis cun in tgerp fisic.

Ussa schai ei vida tei! Alessio Schmed

